

# Agläa ma doch bitte ...

Text: Tom Lackner

1. A Soda Zitron auf an woglich'n Disch  
De Sunn scheid fo hint auf des Biachl fua mia  
Des Lüftal is lau und de Möhschbeis is frisch  
Und da Oba is freindlich ois wia
2. So kenntad s fo mia r aus en gaunz'n Dog blei'm  
Nua iangdwos bassiad glei – i gschbia s im Urin  
»Ealau'm?« frogd a Schdimm, »Is bei lhna no frei?«  
Na bitte, de Ruah is dahin
3. Und ea faungd a glei aun, frogd mi, wos i do lies  
»Goa nix!« sog i, »wäu i kumm ned dazua«  
»Jo jo!« sogd a drauf, »Jo, des is hoid des Gschiss  
Waunn ma aunghänd is rund um die Ua«
4. Und daunn legd a eascht los und aplead ma sein Job  
»Fasicharungsmakla!« – No, des hod ma gföhd  
Ea schüüdad ma braad und in Cinemascope  
Wia gfäalich mia le'm auf dar Wööd
- Refr. Kumm, agläa ma doch bitte, wia d Wööd gehd  
Wos fia Richtung , in dass sa si drahd  
Kumm, sog ma, wia heite da Wind schdehd  
Wohea r a kummd und wohin a uns wahd
5. Mei Dant sitzd im Heim, und duat is ia so faad  
Oisa schau r i hoid eftas fuabei auf an Schbrung  
Oba glei, wia s ma zuweschdeigd, duad s ma scho laad  
»Wos waaßt denn Du? Bisd jo füü z jung ...«
6. Daunn fazöhd s ma fom oid wea'n, und des waa ned gerecht  
Fom Griag und wia weh ia da Fuaß wieda duad  
Und dass unta n Adoif ned ollas so schlecht  
Und so weita, oba mia gang s füü z guad
- Refr. Kumm, agläa ma doch bitte ...
7. Im Wiatshaus, im Bus, in da Kunstgalerie  
Iwaroi schdehd wea, dea ollas duachschaud  
A fahindata Dokta dea Philosophie  
Dea ma ungfrogd sei Gschicht aunfadraud
- Refr. Kumm, agläa ma doch bitte ...  
Kummd s, agläad s ma doch olle, wia d Wööd gehd  
Wos fia Richtung und wia schnöö sa si drahd  
Kummd s, sogd s ma, wia heite da Wind schdehd  
Wohea r a kummd und wohin a uns wahd
8. Aum äagsdn – i schwea s – san de braafm Katholn  
Wos pausnlos »Keuschheit und Demut« fazöhn  
Und si ge'ngseidich haamlich des Popscherl fasohl  
Und ois Buße mi'n Peitschal daunn quöön
- Refr. Kummd s, agläad s doch wen aundan, wia d Wööd gehd  
I wüü s – duad ma laad – nimma hean  
Ob a i-Dipferl grad oda schief schdehd  
Schluckd s as owe, und hodb s mi doch gean!